




十五

第十七
以間齋詩鈔

柳田文庫
文庫11
D 156
15



文應 11
D 156
15

簡齋詩鈔

廿五

陳與義字去非號簡齋汝州葉縣人登上海甲科歷太
學博士擢符寶郎尋謫監陳留酒稅南渡後避亂襄漢
轉湖湘踰嶺嶠召為兵部員外郎紹興中累官翰林學
士知制誥至叅知政事卒年四十九少學詩於崔德符
問作詩之要崔曰工拙所未論大要忌俗而已嘗賦墨
梅受知徽宗遂登冊府高宗尤喜其客子光陰詩卷裏
杏花消息雨聲中之句天分既高用心亦苦意不拔俗
語不驚人_不輕出也晚年益工旗亭傳舍摘句題寫殆
徧號稱新體物寓興清邃紆徐高舉橫厲上下陶謝韋
柳之間劉後村謂元祐後詩人迭起不出蘇黃二體及
簡齋始以老杜為師建炎間避地湖嶠行萬里路言



010190554177

48-2186

奇壯造次不忘憂愛以簡嚴埽繁縟以雄渾代尖巧詭
其品格當在諸家之上劉涇溪序其詩亦謂較勝黃陳
比東坡云如論花高品則色不如香逼真則香不如色
其推尊如此簡齋自言曰詩至老杜極矣蘇黃復振之
而正統不墜東坡賦才大故解縱繩墨之外而用之不
窮山谷措意淡故游泳玩味之餘而索之益遠要必識
蘇黃之所不爲然後可以涉老杜之涯涘味此足以定
其品格矣簡齋晚年讀書吾邑之鄉有遺蹟云

次韻謝文驥主簿見寄兼示劉宣教

斷蓬隨天風飄蕩去何許寒草不自振生死衣牆堵雨塗
俱寂寞衆手劇雲雨坐令習主簿下與雞鶩伍遙知竹林
交未宥一時數翩翩三語掾智與慢相補髯劉吾所畏道
屈空去魯子才亦落落傾蓋極許予四夔照河濱一笑寔
逆旅堂堂吾景方張儀去作泉下士未知我露電能復幾
寒暑息蓐久未決食齋轉覺苦我不逮諸子要先諸子去
不種楊暉田但灌呂安圃未知誰善釀可作孔文舉十年
亦晚矣請便事斯語來詩有十年之約

次韻周教授秋懷

一官不辦作生涯幾見秋風捲岸沙宋玉有文悲落木陶
潛無酒對黃花天機袞袞山新瘦世事悠悠日自斜誤矣
載書三十乘東門何地不宜瓜

次韻張矩臣廸功見示建除體

建德我故國歸哉適我驅除道得歡伯荆棘無復餘滿懷
秋月色未覺飢腸虛平林過西風爲我起笙竽定知張公

子能其寂寞。娛執此以贈君。意重貂襜褕。破帽與青鞋。耐
久心亦舒。危處要進步。安處勿停車。成虧在道德。不在功
利區。收視以爲期。問君此何如。開尊且復飲。辭費道已迂。
閉口味更長。香斷窓樵疎。

題牧牛圖

千里煙草綠。連山雨新足。老牛抱朝飢。向山影覓。犢兒
狂走先過浦。却立長鳴待其母。母子爲人實倉廩。汝飽不
慙人愧汝。牧童生來日日娛。只憂身大當把鋤。日斜睡足
牛背上。不信人間有黃輿。

江南春

雨後江上綠。客悲隨眼新。桃花十里影。搖蕩一江春。朝風
逐船波浪惡。暮風送船無處泊。江南雖好不如歸。老薺遠

墻人得肥。

蠟梅

智瓊額黃且勿誇。回眼視此風前葩。家家融蠟作杏帶。歲
歲逢梅是蠟花。世間真偽非兩法。映日細看真是蠟。我今
嚼蠟已甘腴。况此有韻蠟不如。只愁繁香欺定力。薰我欲
醉須人扶。不辭花前醉倒卧。經月是酒是香君試別。

次韻張元方春雪

雲黃天爲低。窻白雪初作。幽人睡方覺。簾外舞萬鶴。斜斜
旣可人。整整亦不惡。不知來何暮。遂失梅花約。東風桃杏
暖。不受珠璣絡。聊迴萬斛潤。點點付藜藿。幽人無酒飲。一
笑供酬酢。歲晚會復來。相期在丘壑。

雜書示陳國佐胡元茂四首

一官專爲口。俯仰汗我顏。顧將千日飢。換此三歲閒。冥冥
雲表雁。時節自往還。不憂稻粱絕。憂在羅網間。絕勝杜拾
遺。一飽常間關。晚知儒冠誤。猶戀終南山。

杜門十日疾。因得觀安身。勿云千金軀。今視如埃塵。平生
老赤脚。每見生怒嗔。揮汗煮我藥。見此媿其勤。

巨源邦之棟。急士如拾珍。定知柳下鍛。遠勝崔史陳。絕交
雖已隘。益見叔夜真。士要雖衣食。求仁今得仁。釋之與王
生。盛美俱絕倫。吾評竹林詠。未可少居人。

吾昔同年友。壯志各南溟。十年風雨過。見此落落星。秀者
吾元茂。衆器見鼎錙。許身稷高間。不但醉六經。時逢下車
揖。慰我兩眼青。勿憂事不理。伯始在朝廷。

書懷示友十首

俗子令我病。紛然來座隅。賢士費懷息。不受折簡呼。城東
陳孟公。久濶今何如。明月照天下。此夕與君俱。不難十里
勤。畏借東家驢。似聞有老眼。能作薦鶚書。功名勿念我。此
心已埽除。陳孟公謂國佐

張子霜後鷹。眉骨非凡曹。不官兄事錢。但欲僕命騷。胡爲
隨我輩。碌碌著青袍。相逢車馬邊。技癢不得搔。

平生詩作祟。腸肚困藿食。使我忘隱憂。亦自得詩力。絕知
是餘蔽。且復永今日。不知付盃酒。一笑萬事畢。毛穎僅升
堂。麴生真入室。

我夢鍾鼎食。或作山林遊。當其適意時。略與人間侔。覺來
跡便埽。我已不悲憂。人間安可比。夢中無悔尤。

我策三十六。第一當歸田。柴門種雜樹。婆娑樂餘年。是中

三益友。不減二仲賢。柏樹解說法。桑葉能通禪。
有錢可使鬼。無錢鬼揶揄。百年堂前燕。萬事屋上烏。微官
不救飢。出處違壯圖。相牛豈無經。種樹亦有書。如何求二
頃。歸卧淵明廬。曝背對青山。鳥鳴人意舒。試數門前客。終
歲幾覆車。

仲舒老一經。策世非所長。瓦鼎薦蔬食。但取充飢腸。偉哉
賈生書。開闢有耿光。既珍亦可飽。舉俗不見嘗。

楊雄平生學。州賢困雕鐫。晚於玄有得。始悔賦甘泉。使雄
早大悟。亦何事於玄。賴有一言善。酒箴真可傳。

蕭蕭十月菊。耿耿照白草。開窻逢一笑。未覺徐娘老。風霜
要飽更。獨立晚更好。韓公真蹠人。顧用憂懷抱。

青青堂西竹。歲寒不緇磷。蓬蒿衆小中。拭眼見長身。澹然

冬日影。此處極可人。子猷幸見過。一洗聲色塵。

北風

北風掠野悲歲暮。黃塵漲街人不度。孤鴻抱飢客千里。性
命么微不當怒。梅花欲動天作難。蓬飛上天得盤桓。千里
卧木枝葉盡。獨自人間不受寒。

送張仲宗押戟歸闕中

翩然鴻鵠本不羣。亦復爲口長紛紛。去年弄影河北月。今
年迎面江南雲。還家不比陶令冷。持節正效相如勤。青天
白日映徒御。玄髮絳旆明江濱。舟前落花慰野老。浦口杜
若愁湘君。遙知詩成值驛使。萬里春色當見分。贈人以言
予豈敢。不忍負子聊云云。舊山雖好慎勿過。恐有德璋能
勤文。

襄邑道中

飛花兩岸照船紅。百里榆堤半日風。卧看滿天雲不動。不知雲與我俱東。

寄新息家叔

風雨淮西夢。危魂費九升。一官遮日手。兩地讀書燈。見客淡藏舌。吟詩不負丞。竹林雖有約。門戶要人興。

年華

去國頻更歲。爲官不救飢。春生殘雪外。酒盡落梅時。白日山川映。青天草木宜。年華不負客。一一入吾詩。

茅屋

茅屋年年破。春風歲歲來。寒從草根退。花值客愁開。時序添詩卷。乾坤進酒盃。片雲無息極。日暮却空回。

除醜

雨過無桃李。唯餘雪覆牆。青天映妙質。白日照繁香。影動春微透。花寒韻更長。風流到尊酒。猶足助詩狂。

秋雨

蕭蕭十日雨。穩送祝融歸。燕子經年夢。梧桐昨暮非。三涼恩到骨。四壁事多違。袞袞繁華地。西風吹客衣。

西風

水末西風起。中含萬里涼。浮雲不愁息。盡日只飛揚。夢斷頭將白。詩成葉自黃。不關明主棄。本出涸陰鄉。

題許道寧畫

滿眼長江水。蒼然何郡山。向來萬里意。今在一窻間。衆木俱含晚。孤雲遂不還。此中有佳句。吟斷不相關。

和張矩臣水墨梅五絕

巧畫無鹽醜不除。此花風韻更清殊。從教變白能為黑。桃李依然是僕奴。

病見昏花已數年。只應梅蕊故依然。誰教也作陳玄面。眼亂初逢未敢憐。

粲粲江南萬玉妃。別來幾度見春歸。相逢京洛渾依舊。唯恨緇塵染素衣。

含章簷下春風面。造化功成秋兔毫。意足不求顏色似。前身相馬九方皋。

自讀西湖處士詩。年年臨水看幽姿。晴窗畫出橫斜影。絕勝前村夜雪時。

夜雨

經歲柴門百事乖。此身只合卧蒼苔。蟬聲未足秋風起。木葉俱鳴夜雨來。碁局可觀浮世理。燈花應為好詩開。獨無宋玉悲歌念。但喜新涼入酒盃。

以事走郊外示友

二十九年知已非。今年依舊壯心違。黃塵滿面人猶去。紅葉無言秋又歸。萬里天寒鴻雁瘦。千村歲暮鳥烏微。往來屑屑君應笑。要就南池照客衣。

十月

十月北風催歲闌。九衢黃土汙儒冠。歸鴉落日天機熟。老雁長雲行路難。欲詣熱官憂冷語。且求濁酒寄清歡。孤吟坐到三更月。枯木無枝不受寒。

題小室

暫脫朝衣不當閒。澶州夢斷已多年。諸公自致青雲上。病
客長齋繡佛前。隨意時爲獅子臥。安心懶作野狐禪。爐烟
忽散無踪跡。屋上寒雲自黯然。

次韻張迪功春日

年年春日寒欺客。今日春無一半寒。不覺轉頭逢歲換。便
須揩眼待花看。爭新遊女憚垂髯。依舊先生日照盤。從此
不憂風雪厄。杖藜時可過蘇端。

又和歲除感懷用前韻

宦情吾與歲俱闕。只有詩盟偶未寒。髣髴定從今夜改。梅
花已判隔年看。高門召客車稠疊。下里燒香篆屈盤。我亦
三盃聊復爾。夢回鷓鴣出朝端。

卽席重賦且約再遊

詩情不與歲情闕。春風猶兼水氣寒。怪我問花終不語。須
公走馬更來看。共知浮世悲駒隙。卽見平波散芡盤。得一
老兵雖可飲。從今取友要須端。

次韻家叔

袞袞諸公車馬塵。先生孤唱發陽春。黃花不負秋風意。白
髮空隨世事新。閉戶讀書真得計。載肴從學豈無人。只應
又被支郎笑。從者依然困在陳。

次韻答張迪功坐上見貽張將赴南都任二首

足錢便可不須侯。免對妻兒賦百憂。一笑相逢亦奇事。平
生所得是清流。談天安用如鄒子。埽地還應學趙州。南北
東西底非夢。心閑隨處有真遊。

千首能輕萬戶侯。誦君佳句解入愁。夢闌塵裏功名晚。笑

罷尊前歲月流。世事無窮悲客子。梅花欲動憶吾州。明年
又作河梁別。莫負平生馬少游。

題畫兔

碎身鷹犬慙何忍。聖賢詩書事亦微。霜落深林可終歲。雄
雌暖日莫忘機。

寄若拙弟兼呈二十家叔

退之送窮窮不去。樂天待富富不來。政須青山映黑髮。顧
著皂蓋爭黃埃。何如父子共一壑。龐家活計良不惡。阿奴
况自不碌碌。白鷗之盟可同諾。三間瓦屋亦易求。著子東
頭我西頭。中間共作老萊戲。世上樂復有此不。問夢膏肓
應已瘳。歸來歸來無久留。竹林步兵非俗流。爲道此意思
同遊。

次韻謝表兄張元東見寄

平生張翰極風流。好事工文妙九州。燈裏偶然同一笑。書
來已似隔三秋。林泉入夢吾當隱。花鳥催詩歲不留。安得
清談一陶寫。令人絕憶許文林。

若拙弟說汝州可居已約卜一丘用韻寄元東

四歲冷官居濮地。三年羸馬帝王州。陶潛迷路已良遠。張
翰息歸那待秋。病鶴欲飛還蹢躅。孤雲將去更遲留。盍簪
共結雞豚社。一笑相從萬事休。

次韻家弟碧線泉

九孔穿針可得過。冰蠶映日吐寒波。練飛空詠徐凝水。帶
斷疑分漢帝河。川后不愁微步襪。鮫人暗動卷綃梭。才高
下視玄虛賦。對此區區轉患多。

同家第賦蠟梅詩得四絕句

朱朱與白白。著意待春開。那知洞房裏。已傍額黃來。
韻勝誰能舍。色莊那得親。朝陽一映樹。到骨不留塵。
黃羅作廣袂。絳帳作中單。人間誰敢著。畱得護春寒。
一花香十里。更值滿枝開。承恩不在貌。誰敢鬪香來。

連雨賦書事四首

九月逢連雨。瀟瀟穩送秋。龍公無乃倦。客子不勝愁。雲氣
昏城壁。鐘聲咽寺樓。年年授衣節。牢落向他州。
風伯方安臥。雲師亦少饜。氣連河漢潤。聲到竹窻高。老鶴
尤貪去。寒蟬遂不號。相悲更相識。滿眼楚人騷。
寒入薪芻價。速天兩眼愁。生涯赤藤杖。契公黑貂裘。烏鵲
無言暮。蓬蒿滿意秋。同時不同味。世事劇悠悠。

白菊生新紫。黃蕪失舊青。俱含歲晚恨。併入夜深聽。夢寐
連蕭索。更籌亂晦冥。雲移過吳越。應爲洗餘腥。

趙虛中有石名小華山以詩借之

君家蒼石三峰樣。磅礴乾坤氣象橫。賤子與山曾半面。小
窻如夢慰平生。爐煙巧作公超霧。書冊尚避秦王城。病眼
朝來欲開懶。借君岩岫障新晴。

次韻樂文卿北園

故園歸計墮虛空。啼鳥驚心處處同。四壁一身長客夢。百
憂雙鬢更春風。梅花不是人間白。日色爭如酒面紅。且復
高吟置餘事。此生能費幾詩筒。

汝州吳學士觀我齋分韻得真字

狂夫縛軒冕。自許稷契身。靜者樂山林。謂是羲皇人。不如

兩忘快內保一色醇。偉哉道山傑。滯此汝水濱。大來會闊
步。小憩得幽欣。一齋有琴酒。萬事無緇磷。不作子公書。官
受元規塵。人言君侯癡。我知丈人真。月明泉聲細。雨過竹
色新。是間有真我。宴坐方申申。

古別離

東門柳。年年歲歲征人手。千人萬人於此別。柳亦能堪幾
人折。願君遄歸與君期。要及此柳未衰時。

蠟梅四絕

花房小如許。剗切黃金塗。中有萬斛香。與君細細輸。
來從底處所。黃露滿衣濕。緣慙翻得憐。亭亭倚風立。
奕奕金仙面。排行立曉晴。殷勤夜來雪。少住作珠纓。
亭亭金步搖。朝日明漢宮。當時好光景。一似此園中。

錢東之教授惠澤州呂道人硯爲賦長句

君不見銅雀臺邊多事土。走上觚稜蔭歌舞。餘香分盡垢
不除。却寄書林汗縑楮。豈如此瓦凝青膏。冷而不識姦雄
曹。呂翁已去汝餘泣。通譜未許弘農陶。暮年得君真耐久。
摩挲玉質雲生手。未知南越石虛中。亦有文章似君否。西
家樸滿本弟昆。趣清尚濁何年分。一朝墮地真瓦礫。莫望
韓公無瘞文。

述懷呈十七家叔

兒時學道逃悲歡。只今未免憂飢寒。浮生萬事蟻旋磨。冷
官十年魚上竿。竹林步兵亦忍辱。長安閉門出無僕。門前
故人擁廬兒。政坐向來甘碌碌。君不見古人有待良不多。
利名溺人甚風波。垂露成幃仲長統。明月爲燭張志和。塵

中別多會日少。世事欲談何可了。胸中萬卷已無用。勸公
畱眼送飛鳥。兩翁觀光今幾時。賦歸有約時已稽。未暇藏
身北山北。且須覓地西枝西。願從我翁歸荒耳。不用妓女
汙山水。肩輿亦莫要僕夫。自有門生與兒子。

觀我齋再分韻得下字

一慵縛兩脚。閉戶了晨夜。夢攀城西樹。起造君子舍。紫髯
出堂堂。見客披衣謝。平生功名手。嗜靜如食蔗。小齋劇水
壺。中明外無罅。要知日用事。跌坐看鳥下。主人心了了。竹
石亦閒暇。兒童慣看客。我車當日駕。平分齋中閒。風月不
待借。要須酒屢費。不用牛心炙。

歸洛道中

洛陽城邊風起沙。征衫歲歲負年華。歸途忽踐楊柳影。春
事已到燕菁花。道路無窮幾傾轂。牛羊旣飽各知家。人生
擾擾成底事。馬上哦詩日又斜。

道中寒食

斗粟淹吾駕。浮雲笑此生。有詩酬歲月。無夢到功名。客裏
逢歸雁。愁邊有亂鶯。楊花不解事。更作倚風輕。

龍門

不到龍門十載強。斷崖依舊掛斜陽。金銀佛寺浮佳氣。花
木禪房接上方。羸馬乍來還徑去。流鶯多處最難忘。老僧
不作畱人意。看水看山白髮長。

秋夜

中庭淡月照三更。白露洗空河漢明。莫遣西風吹葉盡。却
愁無處著秋聲。

中牟道中二首

雨意欲成還未成。歸雲却作伴人行。依然壞郭中牟縣。千尺浮屠管送迎。楊柳招人不得媒。蜻蜓近馬忽相猜。如何得與涼風約。不共塵沙一併來。

秋雨

塵起一月憂無禾。瓦鳴三日憂雨多。書生重口輕肝腎。不如墻角蚯蚓方長哦。少昊行秋龍灑道。風作萬木皆商歌。病夫強起開戶立。萬箇銀竹驚森羅。人閒偉觀如此少。倚杖不覺泥及鞞。菊叢欲倒未足道。老景知奈梧桐何。是事且置當務本。菜圃已添三萬利。

遊葆真池上

墻厚不盈咫。人間隔蓬萊。高柳喚客遊。我輩御風來。坐久落日盡澹澹。池光開白雲。行水中一笑三徘徊。鳴兒輕歲月不受急景催。試作弄篙驚徐去。首不迴。無心與境接。偶遇信悠哉。再來知何似。有句端難裁。

次韻王堯明郊祀顯相之作

奏書初不待衡譚。奠璧都來萬玉參。黃屋倚霄明半夜。紫壇承月眩諸龕。聲喧大呂初終六。影動元圭陟降三。可是天公須羯鼓。已迴寒玉作春醕。

路歸馬上再賦

偶然思玉仙。便到玉仙遊。興盡未及郭。玉仙失回頭。成毀俱一念。今昔浪百憂。未知橫笛子。亦解此意不。春風所經過。水色如潑油。垂鞭看落日。世事劇悠悠。

來禽花

來禽花高不受折。滿意清明好時節。人間風日不貸春。昨夜臙脂今日雪。舍東蕪菁滿眼黃。胡蝶飛去專斜陽。妍嗤都無十日事。付與梧桐一夏涼。

清明二首

街頭女兒雙髻鴉。隨蜂趁蝶學天邪。東風也作清明節。開遍來禽一樹花。
卷地風拋市井聲。病扶危坐了清明。一簾晚日看收盡。楊柳微風百媚生。

春日二首

朝來庭樹有鳴禽。紅綠扶春上遠林。忽有好詩生眼底。安排句法已難尋。

憶看梅雪縞中庭。轉眼桃稍無數青。萬事一身雙鬢髮。竹牀欹卧數窻櫺。

夏日集葆真池上以綠陰生晝靜賦詩得靜字

清池不受暑。幽討起予病。長安車轍邊。有此荷萬柄。是身唯可懶。共寄無盡興。魚遊水底涼。鳥語林間靜。談餘日亭午。樹影一時正。清風不負客。意重百金贈。聊將兩鬢蓬。起照千丈鏡。微波喜搖人。小立待其定。梁王今何許。柳色幾衰盛。人生行樂耳。詩律已其贖。邂逅一尊酒。他年五君詠。重期踏月來。夜半嘯煙艇。

道山宿直

離離樹子鵲驚飛。獨倚枯筇無限時。千丈虛廊貯明月。十分奇事更新詩。人間路絕窻扉語。天上雲空閣影移。遙想

王戎燭下算。百年辛苦一生癡。

雨晴

天缺西南江面清。纖雲不動小灘橫。牆頭語鵲衣猶濕。樓外殘雷氣未平。盡取微涼供穩睡。急搜奇句報新晴。今宵勝絕無人共。卧看星河盡意明。

十月

十月天公作許悲。負霜鴻雁不停飛。莽連萬里雲山去。紅盡千林秋徑歸。病夫搜句了節序。小齋焚香無是非。睡過三冬莫閉戶。北風不貸芟荷衣。

漫郎

漫郎功業太悠然。柱笏看山了十年。黑白半頭明鏡裏。丹青十樹惡風前。星霜屢費驚人句。天地元須使鬼錢。踏破

九州無一事。只今分付結跏禪。

柳絮

柳送腰肢日幾迴。更教飛絮舞樓臺。顛狂忽作高千丈。風力微時穩下來。

登天清寺塔

爲眼不計脚。攀梯受微辛。半天拍闌干。驚倒地上人。風從萬里來。老夫方岸巾。荒荒春浮水。浩浩空納塵。夕陽差萬瓦。赤鯉欲動鱗。須臾暮煙合。青魴隱齋淪。萬化本日馳。高處覺眼新。借問龕中仙。坐穩今幾晨。俗子書滿壁。澹然不生真。唯有太行山。修供獨殷勤。

浴室觀雨以催詩走羣龍爲韻得走字

微雲生屋脊。歌枕看培塿。崔嵬亂一瞬。秦華入搔首。須臾

萬銀竹。壯觀驚戶牖。摧擊竟自碎。映空白煙走。餘飄送未了。日色在井口。去冬三寸雪。寒日澹相守。商量細細融。未覺經旬久。誰能料天公。辦此脫穎手。一涼滿天地。平分到庭柳。葉端囁餘風。送我一杯酒。畫屏題細字。盡記同來友。俗眼之所遺。此事當不朽。

夏至日與太學同舍會葆真二首

微官有閑闕。三賦池上詩。林密知夏深。仰看天離離。官忙負遠典。觴至及良時。荷氣夜來雨。百鳥青晝遊。微風不動。竚坐看水色移。門前爭奪場。取歡不償悲。欲歸未得去。日暮多黃鸝。

明波影千柳。紺屋朝萬荷。物新感節移。意定覺景多。遊魚聚亭影。鏡面散微漚。江湖豈在遠。所欠雨一簑。忽看帶箬

禽三歎無奈何

秋試院將出書所寓窻

門前柿葉已堪書。弄鏡燒香聊自娛。百世窻明窻暗裏。題詩不用著工夫。

夏日

赤日可中庭。樹影斂不開。燭龍未肯性。一步九徘徊。夢中驚耳鳴。忽覺聞遠雷。屋上奇峰起。欹枕看雲來。變化信難料。轉頭失崔嵬。雖然不成雨。風起亦快哉。槐葉萬背白。少振十日埃。白罔豈辦此。擲去羞薄才。蜻蜓泊牆陰。近入故多猜。牆西豈更熱。已去復飛廻。

送王周士赴發運司屬官

寧食三斗塵。有手不揖無詩人。寧飲三斗醋。有耳不聽無

味句。墻東草葢蘭發薰。君先夢我我夢君。小窻誦詩燈花
喜。窻外北風怒未已。書生得句勝得官。風其少止盡入歡。
五更月暈一千丈。明日君當泛淮浪。去去三十六策中。第
一買酒樂北風。

試院書懷

細讀平安字。愁邊失歲華。疎疎一簾雨。淡淡滿枝花。投老
詩成癡。經春夢到家。茫然十年事。倚杖數栖鴉。

寄題兗州孫大夫絕塵亭

境空納浩蕩。日暮生次寥。竹聲池邊起。欲斷還蕭蕭。丈人
方微吟。萬象各動搖。林間光景異。月出東山椒。門前誰剝
啄。已逝不須邀。

休日早起

朧朧窻影來。稍稍禽聲集。開門知有雨。老樹半身濕。劇讀
了無味。遠遊非所急。蒲團著身寬。安取萬戶邑。開鏡白雲
度。捲簾秋光入。飽受今日閒。明朝復羈繫。

碁

長日無公事。閒圍李遠碁。傍觀真一笑。互勝不移時。幸未
逢重霸。何妨著獻之。晴天散飛雹。驚動隔墻兒。

冬至二首

少年多意氣。老去一分無。閉戶了冬至。日長添數珠。北風
不待節。鴻雁天南驅。烏帽獨何幸。七日守屋廬。石爐煖炷
火。撩亂一榻書。只可自怡悅。不堪寄張扶。

人生本是客。杜叟顧未知。今年我聞道。悲樂兩脫遺。日色
如昨日。未覺墉陰遲。不須行年記。異代尋吾詩。東家窈窕

娘融蠟幻梅枝。但恐負時節。那知有愁時。

西省醪醑架上殘。雪可愛。戲同王元忠席。大光賦詩。餘醪花底當年事。夜雪糝糊照酒闌。北省今朝枝上雪。還指病眼作花看。

對酒

新詩滿眼不能裁。鳥度雲移落酒杯。官裏簿書無日了。樓頭風雨見秋來。是非衮衮書生老。歲月忽忽燕子回。笑撫江南竹根枕。一尊呼起鼻中雷。

後三日再賦

天生癭木不須裁。說與兒童是酒杯。落日留霞知我醉。長風吹月送詩來。一官擾擾身增病。萬事悠悠首獨回。不奈長安小車得。睡鄉深處作奔雷。

赴陳留二首

草草一夢闌。行止本難期。歲晚陳留路。老馬三振鬣。自看鞭袖影。曠野日落遲。柳林行不盡。想見春風時。點點羊散村。陳陳鴻投陂。城中那有此。觸處皆新詩。舉手謝路人。醉語勿取疵。我行有官事。去作三年痴。遙聞辟穀仙。閱世河水湄。時從玩木影。政爾不憂飢。

馬上摩挲眼。出門光景新。鴉鳴半陂雪。路轉一林春。舊歲有三日。全家無十人。平生鸚鵡蓋。今夕最關身。

至陳留

煙際停停堦。招人可得回。等閒爲夢了。聞健出關來。日落河冰壯。天長鴻雁哀。平安遠遊意。隨處一徘徊。

客裏

客裏東風起。蓬入只四愁。悠悠雜唯唯。莫莫更休休。窻影
鳥雙度。水聲船逆流。一官成一集。盡付古河頭。

對酒

陳雷春色撩詩思。一日搜腸一百迴。燕子初歸風不定。桃
花欲動雨頻來。人間多待須微祿。夢裏相逢記此杯。白竹
扉前容醉舞。煙村渺渺欠高臺。

寒食

草草隨時事。蕭蕭傍水門。濃陰花照野。寒食柳圍村。客袂
空佳節。鶯聲忽故園。不知何處笛。吹恨滿清尊。

感懷

少日爭名翰墨場。只今扶杖送斜陽。青青草木浮元氣。渺
渺山河接故鄉。作吏不妨三折臂。搜詩空費九迴腸。子房

與我同羈旅。世事千般酒一觴。

寶園醉中前後五絕句

東風吹雨小寒生。楊柳飛花亂晚晴。客子從今無可恨。寶
家園裏有鶯聲。

海棠脉脉要詩催。日暮紫綿無數開。欲識此花奇絕處。明
朝有雨試重來。

不見海棠相似人。空題詩句滿花身。酒闌却度荒陂去。馳
使風光又一春。

三月碧桃驚動人。滿園光景一時新。賸傾老子尊中玉。折
盡繁枝不要春。

一尊相屬莫辭空。報答今朝吹面風。自唱新詩與明月。碧
桃開盡雨聲中。

雨

沙岸殘春雨。茅簷古鎮官。一時花帶淚。萬里客憑欄。日晚
薜薇重。樓高燕子寒。惜無陶謝手。盡力破憂端。

題酒務壁

野馬本不羈。無奈卯與申。當時彭澤令。定是英雄人。客來
兩繩牀。客去一欠伸。市聲自雜沓。鑪煙自輪囷。鶯聲時節
改。杏葉雨氣新。佳句忽墮前。追摹已難真。白題西軒壁。不
雜徐吏塵。

秋夜詠月

庭樹日日疎。稍覺夜月添。推愁了此段。卷我三間簾。黃花
墻陰透。白髮露氣嚴。平生六尺影。隨我送涼炎。踏破千憂
地。投老乃自嫌。尚想采石江。宮錦映霜蟾。夜半賦詩成。起

舞魚龍兼辦此詎難事。取快端宜廉。

入城

竹輿聲伊鴉。路轉登古原。孟冬郊澤曠。細水鳴蘆根。霧收
浮屠立。天濶鴻雁奔。平生厭喧鬧。快意三家村。息生長林
內。故園歸不存。欲為唐衢哭。聲出且復吞。

夜步隄上三首

世故生白髮。意行無與期。平生水上座。臨老始相知。月中
沙岸永。歲暮河流遲。留侯廟前柳。葉盡空離離。百年信難
料。賸賦奇絕詩。

人間睡聲起。幽子方獨步。倚杖看白雲。亭亭水中度。十月
雁背高。三更河流去。物生各擾擾。念此煎百慮。聊將憂世
心。數遍橋西樹。

旋買青芒鞋。去踏沙頭月。爭教冠蓋地。著此影突兀。樹寒
栖鳥動。風轉孤管發。月色夜夜佳。人生事如髮。夢中續清
遊。濃霧濕銀闕。

晚步

手把古人書。閒讀下廣庭。荒村無車馬。日落雙檜青。曠然
神慮靜。濁俗非所寧。逍遙出荆扉。竚立瞻郊坰。須臾暮色
至。野水皆晶熒。却步面空林。遠意更杳冥。停雲甚可愛。重
疊如沙汀。

同楊運幹黃秀才村西買山藥

潦縮田路寬。委蛇散腰脚。勝日三枝杖。村西買山藥。岡巒
相吞吐。遠木互前却。天陰野水明。歲暮竹離薄。田翁領客
意。發筐堆磊落。玉質紺色裘。用世乃見縛。屠叫幾許快。夜
語尋幽約。石鼎看雲翻。門前北風惡。

招張仲宗

北風日日吹茅屋。幽子朝朝只地爐。客裏賴詩增意氣。老
來唯懶是工夫。空庭喬木無時事。殘雪疎籬當畫圖。亦有
張侯能共此。焚香相待莫徐驅。

寓居劉舍解中晚步過鄭倉臺上

紗巾竹杖過荒陂。滿面春風二月時。世事紛紛人易老。春
陰漠漠絮飛遲。士衡去國三間屋。子美登臺七字詩。草遶
天西青不盡。故園歸計入支頤。

八閩僧房遇雨

脫履坐明窻。偶至情更適。池上風忽來。斜雨滿高壁。探松
含歲暮。幽鳥立晝寂。世故方未闌。焚香破今夕。

贈黃家阿莘

君家阿莘如白玉呼出燈前語陸續可憐郎罷窮一生只
今有汝照茅屋。猪生十子豚復豚阿莘明年可當門階庭
一笑不外索萬事紛紛何足論

發商水道中

商水西門語東風動柳枝年華入危涕世事本前期草草
檀公策茫茫杜老詩山川馬前濶不敢計歸時

西軒寓居

牢落西軒客巡簷費獨吟桃花明薄暮燕子闌微陰辛五
元吾事淹留更此心小窻隨意寫蛇蚓起相尋

鄧州西軒書事十首

小儒避賊南征日皇帝行天第一春走到鄧州無脚力機

花初動雨留人

千里空攜一影來白頭更著亂蟬催書生身世今如此倚
遍周家十二槐

瓦屋三間寬有餘可憐小陸不同居易求蘇子六國印難
得河橋一字書

莫嫌啖蔗佳景遠橄欖甜苦亦相并都將壯節共辛苦準
擬殘年看太平

皇家卜年過周曆變故未必非天仁東南鬼火成何事終
朝胡蜂作爭臣

楊劉相傾建中亂不待白首今同歸只今將相須廉藺五
月并門未解圍

不須夜夜看太白天地景氣今如斯始行相攻策可

借中原見事遲

詔書憂民十六事。父老祝君一萬年。白髮書生喜無寐。從今不仕可歸田。

范公深憂天下日。仁祖愛民全盛年。遺廟只今香火冷。時時風葉一騷然。

諸葛經行有夕風。千秋天地幾英雄。弔古不須多感慨。人生半夢半醒中。

晚步順陽門外

六尺枯藜了此生。順陽門外看新晴。樹連翠篠圍春晝。水泛青天入古城。夢裏偶來那計日。人間多事更聞兵。只應十載溪橋路。欠我嫠嫠勃窣行。

縱步至董氏園亭二首

槐葉層層新綠生。客懷依舊不能平。自移一榻西窗下。要近叢篁聽雨聲。

客子今年馳褐寬。鄧州三月始春寒。簾鈎挂盡蒲團穩。十丈虛庭借雨看。

題簡齋

我窻三尺餘。可以閱晦明。北省雖巨麗。無此風竹聲。不著散花女。而况使鬼兒。世間多岐路。居士繩牀平。未知阮遙集。幾屐了平生。領軍一屋鞋。千載笑絕纓。槐陰自入戶。知我喜新晴。竟句方未了。簡齋真虛名。

春雨

花盡春猶冷。羈心只自驚。孤鶯啼永晝。細雨濕高城。擾擾成何事。悠悠送此生。蛛絲閃夕霽。隨處有詩情。

登城樓

去年夢陳留。今年夢鄧州。幾夢卽了我。一笑城西樓。新晴
草木麗。落日淡欲收。遠川如動搖。景氣明田疇。百年幾憑
欄。亦有似我不。城陰坐來失。白水光不流。丈夫貴快意。少
住寬千憂。歸嫌簡齋陋。局促生白頭。

雨

忽忽忘年老。悠悠負日長。小詩妨學道。微雨好燒香。簷鵲
移時立。庭梧滿意涼。此身南復北。彷彿是他鄉。

夏夜

閒弄玉如意。天河白練橫。時無李供奉。誰識謝宣城。兩鵲
翻明月。孤松立快晴。南陽半年客。復此滿懷清。

鄧州城樓

鄧州城樓高百尺。楚岫秦雲不相隔。傍城積水晚更明。照
見綸巾倚樓客。李白上天不可呼。陰晴變化還須臾。獨撫
危欄詠奇句。滿樓風月不枝梧。

秋日客思

南北東西俱我鄉。聊從地主借胡牀。諸公共得何侯力。遠
客新抄陸氏方。老去事多藜杖在。夜來秋到葉聲長。蓬萊
可託無因至。試覓人間十仞岡。

道中書事

臨老傷行役。籃輿歲月奔。客愁無處避。世事不堪論。白道
含秋色。青山帶雨痕。壞梁斜鬪水。喬木密藏村。易破還家
夢。難招去國魂。一身從白首。隨意答乾坤。

美哉亭

西出城臯關。土谷僅容馳。天掛一疋練。雙崖鬪峩峨。忽然
五丈闕。亭構如危窠。青山麗中原。白日照大河。下視萬里
川。草木何其多。臨高一吐氣。却奈雄風何。辛苦生一快。造
化巧揣摩。險易終不償。翻身下殘坡。

與季申信道自光化復入鄧書事四首

孫子白木杖。富子黑油笠。我獨白竹籃。差池復相及。夕陽
橋邊盡。岸憤歸雲急。勿語城中人。從渠慎出入。
賣舟作歸計。竹籃穩如舟。霧收青臯濕。行路當春遊。老馬
不自知。意欲踏九州。依然還故櫪。寂寞壯心休。

再來生白髮。重見鄧州春。依舊城西路。桃花不記入。卜居
得窮巷。日色滿窻新。微吟驚市卒。獨鶴語城闈。

城西望城南。十日九相隔。何如三枝杖。共踏江上石。門前

流水過。春意滿渠碧。遙知千頃江。如今好顏色。

寄季申

雨歇城南泥未乾。遙知獨立整衣冠。舊時鄴下劉公幹。今
日遼東管幼安。綠陰展盡身猶遠。黃鳥飛來節已闌。安得
一尊生耳熱。暫時相對說悲歡。

重陽

去歲重陽已百憂。今年依舊歎羈遊。籬底菊花唯解笑。鏡
中頭髮不禁秋。涼風又落宮南木。老鷹孤鳴漢北州。如許
行年那可記。謾排詩句寫新愁。

有感再賦

憶得甲辰重九日。天恩曾預宴城東。龍沙此日西風冷。誰
折黃花壽兩宮。

感事

喪亂那堪說。干戈竟未休。公卿危左衽。江漢故東流。風斷黃龍府。雲移白鷺洲。云何舒國步。持底副君憂。世事非難料。吾生本自浮。菊花紛四野。作意為誰秋。

送客出城西

鄧州誰亦解丹青。畫我羸驂曉出城。殘年政爾俱愁了。末路那堪送客行。寒日滿川分衆色。暮林無葉寄秋聲。垂鞭歸去重回首。意落西南計未成。

得席大光書因以詩述之

十月風高客子悲。故人書到暫開眉。也知廊廟當推轂。無奈江山好賦詩。萬事莫論兵動後。一盃當及菊殘時。喜心翻到相迎地。不怕荒林十里岐。

無題

六經在天如日月。萬事隨時更故新。江南丞相浮雲壞。洛下先生宰木春。孟嘉何妨改師法。京房底處有門人。舊喜讀書今懶讀。焚香閱世了閑身。

正月十二日自房州城遇金至奔入南山十五日

抵回谷張家

久謂事當爾。豈意身及之。避連三年行半天。四維我非洛豪士。不畏窮谷飢。但恨平生意。輕了少陵詩。今年奔房州。鐵馬背後馳。造物亦惡劇。脫命真毫釐。南山四程雲。布襪傲險巖。籬間老炙背。無意管安危。知我是朝士。亦復羣其眉。呼酒軟客脚。菜本濯玉肌。窮途士易德。歡喜不復辭。向來貪讀書。閉戶生白髭。豈知九州內。有山如此奇。自寬

實不情。老人亦解頤。投宿恍世外。青燈耿茅茨。夜半不能眠。澗水鳴聲悲。

十七夜詠月

月輪隱東峰。奇彩在南嶺。北崖草木多。蒼茫映光景。玉盤忽微露。銀浪瀉千頃。岩谷散陸離。萬象雜形影。不辭三更露。冒此白髮頂。老筇無前遊。危處有新警。澗光如翻鶴。髮態發遙境。回首房州城。山中夜何永。

與信道遊澗邊

斜陽照亂石。顛崖下雙筇。試從絕谿底。仰視最奇峰。迴磻發澗怒。高靄生樹容。半岩菖蒲根。翠葆森伏龍。豈無避世士。於此儻相逢。客心忽悄愴。歸路逃行蹤。

遊南嶂同孫信道

遙瞻南嶂淡復淡。雙崖與天藏太陰。青鞋濟勝不能懶。踏破積雪窮崎嶇。欽空中朽樹抱孤篠。無竅蒼壁生橫林。孤禽三叫危石裂。欲返未返神蕭森。磴迴忽然何處所。當面煙如翠蛟舞。石門泄風無晝夜。古木截道藏雷雨。丹丘赤城去幾許。下視人間足塵土。放身天地不自知。導以龍蛇翼熊虎。山中異事記今晨。杖藜得道孫與陳。

同信道晚登古原

幽懷忽牢落。起望登古原。微吹度脩竹。半林白翻翻。日暮紛物態。山空銷客魂。惜無一尊酒。與子醉中言。

岸幘

岸幘立清曉。山頭生薄陰。亂雲交翠壁。細雨濕青林。時改客心動。鳥鳴春意深。窮鄉百不理。時得一閒吟。

雨

雲起谷全曙。雨晴山復明。青春望中色。白澗晚來聲。遠樹鳥羣集。高原人獨耕。老夫逃世久。堅坐聽陰晴。

出山二首

陰岩不知晴。路轉見朝日。獨行脩竹盡。石崖千丈碧。山空樵斧響。隔嶺有人家。日落潭照樹。川明風動花。

入山二首

出山復入山。路隨溪水轉。東風不惜花。一暮都開遍。都迷去時路。策杖煙漫漫。微雨洗春色。諸峰生晚寒。

寒食

竹籬寒食節。微雨澹春意。誼譁少所便。寂寞今有味。空山花動搖。亂石水經緯。倚杖忽已晚。人生本何冀。

清明

雨晴閒步澗邊沙。行入荒林聞亂鴉。寒食清明驚客意。暖風遲日醉梨花。書生投老王官谷。壯士偷生漂母家。不用鞦韆與蹴踘。只將詩句答年華。

出山道中

雨歇澹春曉。雲氣山腰流。高崖落絳葉。恍如人世秋。避地時忽忽。出山意悠悠。溪急竹影動。谷虛禽響幽。同行得快士。勝處頻淹留。乘除了身世。未恨落房州。

詠青溪石壁

青溪宜曉日。曲處千丈晦。天開蒼石屏。影落西村外。虛無元氣立。明滅河漢對。人行崢嶸下。鳥急浩蕩內。向來千萬峰。鎖細等蓬壺。老夫倚杖久。三歎造化大。惜哉太史公。意

短遺此快。更欲訪野人。窮探視其背。

和王東鄉絕句四首

少時走馬洛陽城。今作江邊餅錫僧。說與虎頭須畫我。三更月裏影凌嶒。

來日安榴花尚稀。壓墻丹實已垂垂。何時著我扁舟尾。滿袖西風信所之。

只今當代功名手。不數平生粥飯僧。獨立江風吹短髮。暮雲千里倚凌嶒。

平生不得吟詩力。空使秋霜入鬢垂。大岳峰前滿樽月。爲君聊復一中之。

觀江漲

漲江臨眺足消憂。倚杖江邊地欲浮。疊浪併翻孤日去。兩

津橫卷半天流。龍鼉雜怒爭新穴。鷗鷺驚飛失故洲。可爲一官妨快意。眼中唯覺欠扁舟。

同左通老用陶潛還舊居韻

故園非無路。今已不念歸。秋入漢水白。葉脫行人悲。東西與南北。欲往還覺非。勿云去年事。兵火偶脫遺。可憐矜澁影。殘歲聊相依。天涯一尊酒。細酌君勿催。持觴望江山。路永悲身衰。百感醉中起。清淚對君揮。

同通老用淵明獨酌韻

紛紛吏民散。遺我以兀然。悄悄今夕意。身影馳隙間。向來房州谷。採藥危得仙。忽駕太守車。出處寧非天。何妨暫闕世。謀行要當先。西齋一壺酒。微雨新秋還。蛛網閃明晦。葉聲饒歲年。呼兒具紙筆。錄我醉中言。

欲離均陽而雨不止書八句寄何子應
江城八月楓葉彫城頭俄詩江動搖秋雨雷入意戀戀水
光泛樹風蕭蕭綸巾老子無遠策長作東西南北客不知
何遜在揚州坐待梅花映妝額

均陽舟中夜賦

遊子不能寐船頭語輕波開窻望兩津煙樹何其多晴江
涵萬象夜半光蕩摩客愁彌世路秋氣入天河汝洛塵未
銷幾人不負戈長吟宇宙內激烈悲蹉跎

舟次高舍書事

漲水東流滿眼黃泊舟高舍更情傷一川水葉明秋序兩
岸人家共夕陽亂後江山元歷歷世間岐路極茫茫遙指
長沙非謫去古今出處兩淒涼

登岳陽樓二首

洞庭之東江水西簾旌不動夕陽遲登臨吳蜀橫分地徙
倚湖山欲暮時萬里來遊還望遠三年多難更凭危白頭
弔古霜風裏老木蒼波無限悲

天入平湖晴不風夕帆和雁正浮空樓頭客子抄秋後日
落君山元氣中北看可堪回白首南遊聊得看丹楓翰林
物色分畱少詩到巴陵還未工

巴丘書事

三分書裏識巴丘臨老避■初一遊晚水聲酣洞庭野晴
天影抱岳陽樓四年風露侵遊子十月江湖吐亂洲未必
上流須魯肅腐儒空白九分頭

晚步湖邊

客間無勝日。世故可暫逃。杖藜迎落照。寒彩徧平臯。夕湖
光景麗。晴鶴聲音豪。天長蒹葭響。水落城堞高。萬象各搖
動。慰此老不遭。楚纍經行地。處處餘離騷。幸無大夫貴。得
伴諸子遨。終然動懷抱。白髮風中搔。

再登岳陽樓感賦詩

岳陽壯觀天下傳。樓陰背日堤綿綿。草木相連南服內。江
湖異態闡千前。乾坤萬事集雙鬢。臣子一謫今五年。欲題
文字弔古昔。風壯浪湧心茫然。

居夷行

遭亂始知承平樂。居夷更覺中原好。巴陵十月江不平。萬
里北風吹客倒。洞庭葉稀秋聲歇。黃帝樂罷川杲杲。君山
偃蹇橫歲暮。天映湖南白如埽。人世多違壯士悲。干戈未
定書生老。揚州雲氣鬱不動。白首頻回費私禱。后勝誤齊
已莫追。范蠡圖越當若爲。皇天豈無悔過意。君子慎惜經
綸時。願聞羣公張王室。臣也安眠送餘日。

除夜

城中爆竹已殘更。朔吹翻江意未平。多事髣毛隨節換。盡
情燈火向人明。比量舊歲聊堪喜。流轉殊方又可驚。明日
岳陽樓上去。島煙湖霧看春生。

曉登燕公樓

闌干納清曉。柱杖追黃鵠。燕公不相待。使我立於獨。霧收
天落川。日動春浮木。舉手謝時人。微風吹野服。

詠水仙花五韻

仙人緇色裘。縞衣以褌之。青旣紛委地。獨立東風時。吹香

洞庭暖弄影。清晝遲寂寂。籬落陰亭亭。與子期誰知。園中客能賦。會真詩。

望燕公樓下李花

燕公樓下繁華樹。一日遙看一百迴。羽蓋夢餘當晝立。縞衣風急過牆來。洛陽路不容春到。南國花應爲客開。今日豈堪簪短髮。感時傷舊意難裁。

陪粹翁舉酒於君子亭下海棠方開

世故驅人殊未央。聊從地主借繩牀。春風浩浩吹遊子。暮雨霏霏濕海棠。去國衣冠無態度。隔簾花葉有輝光。使君禮數能寬否。酒味撩人我欲狂。

春夜感懷寄席大光

管寧白帽且踟躕。孤鶴歸期難計年。倚杖東南觀百變。傷

心雲霧隔三川。江湖氣動春還冷。鴻雁聲迴人不眠。苦意西州老太守。何時相伴一燈前。

夜賦寄友

賣藥韓康伯。談經管幼安。向來甘寂寞。不是爲艱難。明月扶疎樹。空園浩蕩寒。細題今夕景。持與故人看。

陰風

陰風三日吹南極。二月巴陵寒裂石。長林巨木受軒輊。洞庭倒流瀟湘黑。君不見古廬竹扉聲策策。中有吟嬾落南。曾經破膽向炎官。敢不修容待風伯。

雨

霏霏三日雨。靄靄一園春。霧澤含元氣。風花過洞庭。地偏寒浩蕩。春半客吟嬾。多少人間事。天涯醉又醒。

春寒

二月巴陵日日風。春寒未了怯園公。海棠不惜胭脂色。獨
上濛濛細雨中。

次韻傅子文絕句

風雨門前十日泥。荒階相伴只筇枝。從今老子都無事。落
盡園花不賦詩。

城上晚息

獨凭危堞望蒼梧。落日君山如畫圖。無數柳花飛滿岸。晚
風吹過洞庭湖。

雨中對酒庭下海棠經雨不謝

巴陵二月客添衣。草草杯觴恨醉遲。燕子不禁連夜雨。海
棠猶待老夫詩。天翻地覆傷春色。齒豁頭童視聖時。白竹

籬前湖海濶。茫茫身世兩堪悲。

尋詩兩絕句

楚酒困人三日醉。園花經雨百般紅。無人畫出陳居士。亭
角尋詩滿袖風。

愛把山瓢莫笑儂。愁時引睡有奇功。醒來推戶尋詩去。喬
木崢嶸明月中。

寒食日遊百花亭

晴氣已復濁。虛館可淹留。微花耿寒食。始覺在它州。自聞
鼙鼓聒。不恨歲月流。亂代有今夕。茲園况堪遊。雲移樹陰
失。風定川華收。曳杖新城下。日暮禽語幽。羣行意易分。獨
賞興難周。永嘯以自暢。片月生城頭。

周尹潛以僕有郢州之命。作詩見贈。有橫槊之句。次

韻謝之

一歲憂兵四閱時。偷生不恨隙駒馳。如何南紀持竿手。却把西州破賊旗。儻有青油盛快士。何妨畫戟入新詩。因君調我還增氣。男子平生竟要奇。

次韻尹潛感懷

見又看繞淮春。歎息猶爲國有人。可使翠華周寓縣。誰持白羽靜風塵。五年天地無窮事。萬里江湖見在身。共說金陵龍虎氣。放臣迷路感煙津。

泊宋田遇厲風作

逐隊避狂寇。湖中可盤嬉。泊舟宋田港。俯仰看雲移。造物猶不惜。顛風忽橫吹。洞庭何其大。浪挾雲車馳。可憐岸上竹。翻倒不自持。老夫元耐事。淹速本無期。會有大風定。見

沙亭亭時。五月念貂裘。竟生薄暮悲。蕭蕭不自暢。耿耿獨題詩。

贈傅子文

漁子牧兒談笑新。先生勝日步湖濇。沙邊忽見長身士。頭上仍欹折角巾。豺虎不能寬遠俗。山川終要識詩人。蘆叢如畫斜陽裏。柱杖相尋無雜賓。

晚晴野望

洞庭微雨後。涼氣入綸巾。水底歸雲亂。蘆叢返照新。遙汀橫薄暮。獨鳥度長津。兵甲無歸日。江湖送老身。悠悠只倚杖。悄悄自傷神。天意蒼茫裏。村醪亦醉人。

舟抵華容縣

篙舟入華容。白水繞城堞。夾津列茂樹。倒影青相接。遠色

分村塲。微涼動蘆葉。天地困腐儒。江湖託孤楫。

夜賦

泊舟華容縣。湖水終夜明。淒然不能寐。左右菰蒲聲。窮途事多違。勝處亦心驚。三更螢火鬧。萬里天河橫。阿瞞狼狽地。山澤空崢嶸。強弱與興衰。今古莽難平。腐儒憂平世。况復值甲兵。終然無寸策。白髮滿頭生。

晚晴

幽卧不知曉。櫛梢見斜日。披衣起四望。天際山爭出。光輝落蒲淨。意氣沙鷗逸。避盜半九圍。兩脚不遺力。川陵各異態。艱險常一律。胡爲作弧矢。前聖意莫詰。豈知百代後。反使奸宄腐。儒徒嘆嗟。救弊知無術。人生如歸雲。空行雜徐疾。薄暮俱到山。各不見踪跡。念此百年內。可復受憂厭。

林木方翳然。放懷陶茲夕。

九月八日登高作重九奇父賦三十韻與義拾餘意

亦賦十二韻

九日風景好。節意滿天涯。書生尊所聞。登高亂城鴉。雖無後乘麗。前驅載黃花。兩樓壓波壯。衆澤分天斜。居驚有苗訪古悲。章華蕭條湖海事。勝日一笑譁。興移三里亭。木影雜蛟蛇。二士醉藜杖。兩禪風袈裟。奇哉古無有。未覺欠孟嘉。天公亦喜我。催詩出微霞。賦罷迹已陳。憂樂如轉車。却後五百歲。遠俗增雄誇。

禕翁用奇父韻賦九日與義同賦兼呈奇父

安穩輕節序。艱難惜歡娛。先生守苜蓿。朝士誇茱萸。前年鄧州城。風雨傾客居。何嘗疎麴生。麴生自我疎。豈無登高

地送目與雲俱。門生及兒子。勸我升籃輿。出門復入門。戈
旆填街衢。去年鄧州岸。孤檝對壞郭。莫招大夫魂。誰攬使
君鬚。獨題懷古句。枯硯生明珠。亦復躋荒戍。日暮野踟躕。
白衣終不至。渺渺空愁予。今年洞庭上。九折餘崎嶇。時憑
岳陽樓。山川看縈紆。孫兄語蟬連。王丈色數腴。不用踏筵
舞。秋風搖菊株。樂哉未曾有。是夢其非歟。丈夫各堂堂。坐
受世故驅。會須明年節。醉倒還相扶。此花期復對。勿令墮
空虛。明日風景佳。南翔先一息。何言知幾早。政爾因鱸魚。
分襟肺肝熱。撫事歲月迂。歸家問銜錫。生理何必餘。相期
衡山南。追步凌忽區。回首望堯雲。中原莽榛蕪。臣豈專愛
死。有懷竟不舒。老謀與壯事。二者慙俱無。

送王因叔赴試

楓落南紀明。秋高洞庭白。自是天涯人。更送湖上客。人生
險易乘除裏。富貴功名從此起。不須惜別作酸然。滿路新
詩付吾子。

別岳州

朝食三斗葱。暮飲三斗醋。寧受此酸辛。莫行歲晚路。丈夫
少壯日。忍窮不自恕。乘除莫晚泰。乃復逢變故。經年岳陽
樓。不見南宮樹。辭巢已萬里。兩脚未遑住。水落君山高。洞
庭秋已素。浮雲易歸岫。遠客難回顧。飄然一銜錫。未知所
掛處。寂寞短歌行。蕭條遠遊賦。學道始恨晚。爲儒孰非腐。
乾坤杳茫茫。三歎出門去。

初識茶花

伊軋藍輿不受催。湖南秋色更佳哉。青裙玉面初相識。九

月茶花滿路開

別伯共

尊酒相逢地。江楓欲盡時。猶能十日客。共出數年詩。供世無筋力。驚心有別離。好爲南極柱。深慰旅人悲。

再別

多難還分手。江邊白髮新。公爲九州督。我是半途人。政爾傾全節。終然却要身。平生第溫嶠。未必下張巡。

別孫信道

萬里鷗仍去。千年鶴未歸。極知身有幾。不奈世相違。歲暮蒹葭響。天長鴻雁微。如君那可別。老淚欲沾衣。

江行野宿寄大光

橋鳥送我入蠻鄉。天地無情白髮長。萬里回頭看北斗。三

更不睡聽鳴榔。平生正出元子下。此去還經息曠傍。投老相逢難袞袞。共恢詩律撼瀟湘。

寄信道

衡山未見意如飛。浩蕩風帆不可期。却憶府中三語掾。空吟江上四愁詩。高灘落日光零亂。遠岸叢梅雪陸離。賸欲平分持寄子。白頭才盡只成悲。

衡嶽道中四首

野客元耕嵩嶽田。得遊衡嶽是前緣。避兵徑度吾豈忍。欲雨還休神所憐。世亂不妨松偃蹇。村空更覺水潺湲。非無柱杖終傷老。負此名山四十年。

客子山行不覺風。龍吟虎嘯滿山松。綸巾一幅無人識。勝業門前聽午鐘。

城中望衡山。浮雲作飛蓋。榻來岩谷遊。却在浮雲外。
危亭見上方。林壑帶殘陽。今日豈無恨。重遊却味長。

除夜次大光韻。大光是夕婚。

一杯節酒莫留殘。坐看新年上鬢端。只恐梅花明日老。夜
鏘相對不知寒。

除夜不寐。飲酒一盃。明日示大光。

萬里鄉山路不通。年年佳節百憂中。催成客睡須春酒。老
却梅花是曉風。

元日

五年元日只流離。楚俗今年事事非。後飲屠蘇今已老。長
乘解纜竟安歸。攜家作客真無策。學道剝心却自違。汀草
岸花知節序。一身千恨獨沾衣。

別大光

堂堂一年長。渺渺三秋濶。恍然衡山前。相遇各白髮。歲窮
窻欲霰。人老情難竭。君有杯中物。我有肝肺熱。飲盡不能
起。交淡忘事拙。乾坤日多虞。遊子屢驚骨。衡陽非不遙。雁
意猶超忽。一生能幾回。百計易相奪。滔滔江受風。耿耿客
孤發。他夕懷君子。岩間望明月。

道中

雨子收還急。溪流直又斜。迢迢傍山路。漠漠滿林花。破水
雙鷗影。掀泥百草芽。川原有高下。隨處著人家。

將至杉木鋪。望野人居。

春風漠漠野人居。若使能詩我不如。數株蒼檜遮官道。一
樹桃花映草廬。

曉發杉木

古澤春光淡。高林露氣清。紛紛世上事。寂寂水邊行。客子凋雙鬢。田家自一生。有詩還忘記。無酒却思傾。

先寄邢子友

作客經年樂有餘。邵陽岐路不崎嶇。山川好處歆紗帽。桃李香中度笏輿。欲見舊交驚歲月。剩排幽語說艱虞。人間書疏非吾事。一首新詩未可無。

立春日雨

衡陽縣下春日雨。遠映青山綠樣斜。容易江邊欺客袂。分明沙際濕年華。竹林路隔生新水。古渡船空集亂鴉。未暇獨憂巾一角。西溪當有續開花。

初至邵陽逢入桂林使作書問其地之安危

湖北彌年所。長沙費月餘。初爲邵陽夢。又作桂林書。老矣身安用。飄然計本疎。管寧遼海上。何得更端居。

過孔雀灘贈周靜之

海內無堅壘。天涯有近親。不辭供笑語。未慣得殷勤。舟楫淡宜客。溪山各放春。高眠過灘浪。已寄百年身。

江行晚興

曾聽石樓水。今過邵州灘。一笑供舟子。五年行路難。雲間落日淡。山下東風寒。煙嶺叢花照。夕灣羣鷺盤。生身後聖哲。隨俗了悲歡。淹旅非吾病。悠悠良足歎。

夜抵貞牟

野暝猶聞遠。川明不恨遲。焚山隔岸火。及我繫船時。夜半青燈屋。籬前白水陂。殷勤謝地主。小築欲深期。

雨

雲物澹清曉。無風溪自閑。柴門對急雨。壯觀滿空山。春發蒼茫內。鳥鳴篁竹間。兒童笑老子。衣濕不知還。

今夕

今夕定何夕。對此山蒼然。偷生經五載。幽意獨已堅。微陰拱衆水。靜夜聞孤泉。唯應寂寞事。可以送餘年。

暝色

殘輝度平野。列岫圍青春。柴門一枝筇。日暮棲心神。暝色著川嶺。高低鬱輪茵。水光忽到樹。山勢欲傍人。萬化元相尋。幽子意自新。肅肅夜將久。空明動邊垠。田鶴吟相應。我獨無荒鄰。短篇不可就。所寄聊一伸。

貞牟書事

留侯辟穀年。漢鼎無餘功。子真策不售。脫迹市門中。神仙非異人。由來本英雄。撫世獨餘事。用舍何必同。眷茲貞牟野。息駕吾其終。蒼山雨中高。綠草溪上豐。仲春水木麗。禽鳴清晝風。禍福兩合繩。既解一身空。榮華信非貴。寂寞亦非窮。

山中

當復入州寬。作期人間踏。地有安危。風流丘壑真。吾事籌策廟堂非所知。白水春波天澹澹。蒼峰晴雪錦離離。恰逢居士身輕日。正是山中多景時。

謝主人

春禽勸我歸。主人留我住。一笑謝主人。我自無歸處。擬借溪邊三畝春。結茅依樹不依鄰。伐薪正可煩名士。分米何

須待故人。

羅江二絕

荒村終日水車鳴。陂北陂南共一聲。灑面風吹作飛雨。老夫詩到此間成。
山翁見客亦欣然。好語重重意不傳。行過竹籬逢細雨。眼明雙鷺立青田。

三月二十日聞德音寄李德升席大光新有召命皆

寓永州

塵隔斗牛三月餘。德音再與萬方初。又蒙天地寬今歲。且掃軒窗讀我書。自古安危關政事。隨時憂喜到樵漁。零陵併起扶顛手。九廟無歸計莫疎。

題東家樓

斜陽步屨過東家。便置清尊不煮茶。高柳光陰初罷絮。嫩鳧毛羽欲成花。羣公天上分時棟。閑客江邊管物華。醉裏吟詩空跌宕。借君素壁落栖鴉。

曳杖

柳條一何長。我髮一何短。餘日會有幾。經春卧荒曠。曳杖陂西去。悠然寄蕭散。田壟粲高低。白水一時滿。農夫暮猶作媿。我讀書嬾。且復棄今茲。前峰青蹇蹇。

開壁置窻命曰遠軒

鍾妖鳴吾旁。楊獠舞吾側。東西俱有礙。羣盜何時息。丈夫堂堂軀。坐受世福迫。仙入千仞岡。下視笑予厄。誰能久鬱鬱。持斧破南壁。窻開三尺明。空納萬里碧。岩霏雜川靄。奇變供凡席。誰見老書生。軒中岸玄幘。蕩漾浮世裏。超遙送

茲夕倚楹發孤嘯。呼月出荒澤。天公亦粲然。林壑受珠璧。
會有鶴賀賓。經過來見客。

再賦

清曉坐南軒。望山頭屢側。居士亦豈痴。飛雲方未息。樂哉
此遠俗。亂世免怵迫。那知百戰禍。豈識三空厄。閉門美熟
睡。開門瞻翠壁。遠客謝主人。分此一窻碧。新晴鳥鳴簷。微
暑風入席。蕭然此白首。豈更冒朝幘。誓將老茲地。不復數
晨夕。但恨食無肉。懼仙出山澤。蟄雷轉空腸。吐句作圭璧。
一笑示鄰家。向來無此客。

又賦

我昨在衡山。傷心衢路側。豈知得此地。一坐數千息。易安
生痛定。過美山飢迫。誓言如齊侯。常戒在葛屨。要將萬里
身。獨面九年壁。如何不已奈。開憲翫霏碧。招呼面前山。浮
翠落衾席。一笑等兒戲。都忘雪侵憤。人生何不娛。今夕定
何夕。向來萬頃智。餘地吞七澤。念此亦細事。未遽取生壁。
聊使山中人。永記山下客。

傷春

廟堂無策可平戎。坐使甘泉照夕烽。初怪上都聞戰馬。豈
知窮海看飛龍。孤臣霜髮三千丈。每歲煙花一萬重。稍喜
長沙向延閣。疲兵敢犯犬羊鋒。

題水西周三十三壁二首

下管先生巾欲摧。雨中艇子便撐開。青山隔岸迎人去。白
鷺衝煙送酒來。

周子筍中早得春。喚人同度一溪雲。貪看雨歇前峰變。不

覺對時已十分

山齋

雖愧荷鋤叟。朝來亦不開。自剪墻角樹。盡納溪西山。經行天下半。送老此窻閒。日暮煙生嶺。離離飛鳥還。

散髮

百年如寄亦何爲。散髮清狂未足非。南澗題詩風滿面。東橋行藥露霑衣。松花照夏山無暑。桂樹留人吾豈歸。藜杖不當軒蓋用。穩扶居士莫相違。

觀雨

山客龍鐘不解耕。開軒危坐看陰晴。前江後嶺通雲氣。萬壑千林送雨聲。海壓竹枝低復舉。風吹山角晦還明。不嫌屋漏無乾處。正要羣龍洗甲兵。

寄大光二絕句

心折零陵霜入鬢。更修短札問何如。江湖不是無來雁。只慣平生作報書。

芭蕉急雨三更鬧。客子殊方五月寒。近得會稽消息否。稍傳荆渚路岐寬。

村景

黃昏吹角聞呼鬼。清曉持竿看牧鷺。蠶上樓時桑葉少。水鳴車處稻苗多。

寄德升大光

若玉憂詔起羣公。也寘樵夫尺一中。易著青衫隨世事。難將白髮犯秋風。共談太極非無意。能繫蒼生本不同。却倚紫陽千丈嶺。遙瞻黃鶴九霄東。

次韻邢九息

百年鼎鼎雜悲歡。老去初依六祖壇。玄晏不堪長抱病。子真那復更爲官。山林未必容身得。顏面何宜與世看。白帝高尋最奇事。共君盟了不應寒。

遙碧軒作呈使君少隱時欲赴召

我本山中人。尺一喚起趨埃塵。君爲邊城守。作意邀山入。窻牖朝來爽氣如有期。送我憑軒一杯酒。丈夫已忍猿鶴羞。欲去且復斯須留。西峰木脫亂鬢擁。東嶺煙破脩眉浮。主人愛客山更好。醉裏一笑驚蠻州。丁寧雲雨莫作厄。明日青山當逐客。

石隈病起

幽人病起山深處。小院鴉鳴日午時。六尺屏風遮宴坐。一

簾細雨獨題詩

愚溪

小閣當喬木。清溪抱竹林。寒聲日暮起。客思雨中深。行李妨幽事。欄干試獨臨。終然遊子意。非復昔人心。

已酉中秋之夕。與任才仲醉於岳陽樓上。明年十一月二十日。南遊過道。謁姜光彥。出才仲畫軸。則寫是夕事也。剪燭觀之。恍然一笑。書八句以當畫記。去年中秋洞庭野。寒瑤萬頃兼天瀉。岳陽樓上兩幅巾。月入闌干影瀟灑。世間此影誰能孤。狂如我友人所無。一夢經年無續處。道州還見倚樓圖。

度嶺

年律將窮天地溫。兩州風氣此橫分。已吟子美湖南句。更

擬東坡嶺外文。隔水叢梅疑是雪。近人孤嶂欲生雲。不愁
去路三千里。少住林間看夕曛。

次韻謝呂居仁。居仁時寓賀州。

別君不覺歲時荒。豈意相逢魑魅鄉。篋裏詩書總寥落。天
涯形貌各昂藏。江南今歲無。嶺表窮冬有雪霜。儻可
卜鄰吾欲住。草茅爲蓋竹爲梁。

舟行遣興

會稽尚隔三千里。臨賀初盤一百灘。殊俗問津言語異。長
年爲客路岐難。背入山嶺重重去。照鷁梅花樹樹殘。酌酒
拖樓今日意。題詩船壁後來看。

康州小舫與耿伯順李德升席大光鄭德象夜語以
更長愛燭紅爲韻得更字

萬里衣冠京國舊。一船風雨晉康城。燈前顏面重相識。海
內艱難各飽更。天濶路長吾欲老。夜闌酒盡意難傾。明朝
古峽蒼煙道。都送新愁入櫓聲。

與大光同登封州小閣

去程欲數莽難知。三日封州更作遲。青嶂足稽天下士。錦
囊今有矯南詩。共登小閣春風裏。同望中原夕靄時。萬本
梅花爲我壽。一杯相屬未全癡。

登海山樓

萬航如鳧鷖。一水如虛空。此地接元氣。壓以樓觀雄。我來
自中州。登臨眩冲融。白波動南極。蒼髯承東風。人間路浩
浩。海上春濛濛。遠遊爲兩眸。豈惜勞我躬。仙人欲吾語。薄
暮山葱蘢。海清無蜃氣。彼固蓬萊宮。

雨中再賦海山樓詩

百尺闌干橫海立。一生襟抱與山開。岸邊天影隨潮入。樓上春容帶雨來。慷慨賦詩還自恨。徘徊舒笑却生哀。滅
猛士今安有。非復當年單父臺。

題長樂亭

遠山雲迷顛。近山淨如沐。客子曳竹輿。伊啞過山麓。我行一何遲。時序一何速。東風所經過。林水一時綠。疎雨忽飛墜。聲在道邊水。淑氣自遠歸。光景變川陸。遙知存存子。明亦戒征軸。霽色雖宜詩。不見此清穆。

題長岡亭呈德升大光

久客不忘歸。如頭垢思沐。身行江海濱。夢繞嵩山麓。馬何預得大。鵬何小。滄速。匣中三尺水。瘴雨生新綠。胡爲古驛中。坐聽風吟木。旣非還吳張。亦異赴洛陸。兩公茂名實。自是宜鼎軸。發發不可遲。帝言頻郁穆。

贈漳州守蔡叔厚

過盡蠻荒興復新。漳州畫戟擁詩人。十年去國九行旅。萬里逢公一欠伸。王粲登樓還感慨。紀瞻赴召欲逡巡。繩牀相對有今日。臙醉齋中軟脚春。

宿資聖院閣

暮投山崦寺。高處絕人羣。遠岫林間見。微泉舍後聞。閣虛雲亂入。江濶野橫分。欲與僧爲記。今年懶作文。

自黃岩縣舟行入台州

宴坐峰前衝雨急。黃岩縣裏借舟遲。百年痴點不相補。萬事悲歡豈可期。莽莽蒼波兼宿霧。紛紛白鷺落山坡。只應

江海淒涼地。欠我臨風一賦詩。

過下杯渡

夜宿下杯館。朝鳴一棹東。湖平天盡落。峽斷海橫通。冉冉雲隨舸。茫茫鳥遡風。仙入蓬島上。遙見我乘空。

泛舟入前倉

曾鼓鹽田棹。前倉不足言。盡行江左路。初過浙東村。春去花無迹。潮歸岸有痕。百年都幾日。聊復信乾坤。

送熊博士赴瑞安令

衣冠袞袞相逢處。草木蕭蕭未變時。聚散同驚一枕夢。悲歡各誦十年詩。山林有約吾當去。天地無情子亦飢。笑領銅章非失計。歲寒心事欲深期。

病中夜賦

抱病喜清夜。形羸心獨開。不知藥鼎沸。錯認雨聲來。歲晚燈燭麗。天長鴻雁哀。書生惜日月。歌枕意茫哉。

喜雨

秦望山頭雲。昨日鸞鳳舉。冥冥萬里風。浙浙三更雨。小臣知君憂。起坐聽簷語。風力有去來。龍工離文武。燈花識我意。一笑相媚嫵。泥翻早朝路。瀾瀾光欲吐。鬱然蒼龍闕。佳氣接南畝。千官次第來。豫色各眉宇。記事以短篇。不工還自許。

醉中

醉中今古興衰事。詩裏江湖搖落時。兩手尚堪盃酒用。寸心唯是髻毛知。稽山擁郭東西去。禹穴生雲朝暮奇。萬里南征無賦筆。茫茫遠望不勝悲。

不見梅花六言
荆楚歲時經盡。今年不見梅花。想得蒼煙玉立。都藏江上人家。

梅花

鐵面蒼髯洛陽客。玉顏紅領會稽仙。街頭相見如相識。恨滿東風意不傳。

雨

聽雨披夜襟。衝雨踏晨鼓。萬珠絡筍輿。詩中有新語。老龍經秋困。歲暮始一舉。成功亦何遲。光彩變蔬圃。道邊聞井溢。可笑遽如許。舊山百尺泉。不知旱與雨。

除夜

昔追歡事。如今病不能。等閒生白髮。耐久是青燈。海內

春還滿。江南硯不冰。題詩餞殘歲。鐘鼓報晨興。

雨中

七客霜侵鬢。南州雨送年。未聞兵革定。從使歲時遷。古澤生春靄。高空落暮鳶。山川含萬古。鬱鬱在尊前。

渡江

江南非不好。楚客自生哀。搖撼天平渡。迎入樹欲來。雨餘吳岫立。日照海門開。雖異中原險。方隅亦壯哉。

夙興

美哉木枕與菅席。無禁當興戴朝幘。巷南巷北聞鉦聲。舍後舍前唯月色。事國無功端未去。竹輿伊軋猶昨日。不見武林城裏事。繁華夢覺生荆棘。成敗由來幾古今。乾坤但可著山澤。西湖已無金碧麗。雨抹晴妝尚娛客。會當休日

一訪之。摩挲蒼蘚。慰崖石。只恐冷泉亭下水。發明白髮增歎息。

幽窻

貧士工用短。壯夫弱於詩。破壁爲幽窻。我筆還得持。高鳥度遺影。風扉語移時。迨我休暇日。與物聊同嬉。古來賢哲人。畎畝策安危。一行或大謬。半隱良亦癡。寄言山中友。卽歲以爲期。

休日馬上

休日不自休。騎馬踏荒徑。却扇受景風。今朝我無病。春雲闕晨耀。羣綠澹相映。山川與朝市。一動自一靜。九衢行萬人。誰抱此懷勝。不得與之語。蕭蕭寄孤詠。

題畫

分明樓閣是龍門。亦有溪流曲抱村。萬里家山無路入。十年心事與誰論。

題崇蘭圖二首

兩公得我色。敷腴藜杖相。將入畫圖。我已夢中多識路。秋風舉袂不踟躕。奕奕天風吹角巾。松聲水色一時新。山林從此不牢落。照影溪頭共六人。

秋夜獨酌

涼秋佳夕。天氣廓。河漢之涯。秋漠漠。月出未出。林彩變。幽人露坐。方獨酌。自歌新調。酒如空。天星下。飲觥船中。忽思李白。不可夜半。喬木搖西風。百年佳月。幾今夕。憂樂相尋。老來疾。瓊瑤滿地。我影橫。添酒賦詩。何可失。

九日示大圓洪智
自得休心法。悠然不賦詩。忽逢重九日。無耐菊花枝。

劉大資挽詞二首

天柱欹傾日。堂堂墮。圍遂開。王蠋死。不見華元歸。一代名超古。千年淚染衣。當時如有繼。猶足變危機。一死公餘事。由來亦人。使知臨難日。猶有不欺臣。河洛傾遺憤。英雄歎後塵。煌煌中興業。公合冠麒麟。

觀雪

無住菴前境界新。瓊樓玉宇總無塵。開門倚杖移時立。我是人間富貴人。

小閣晨起

紙帳不知曉。鴉鳴吾當典。開窓面老松。相對寒峻嶒。幸無公家責。欲懶還不能。汲井頽我面。銅盆旋敲冰。梳頭風入檻。散髮霜滿脰。四瞻郊澤間。蒼煙慘朝凝。却望塔顛日。光景舒層層。乾坤有奇事。變化忽相乘。客來無可語。語此不見鷹。今晨胡牀冷。愧我無髭鬣。

小閣晚望

澤國候易變。孟冬乃微和。解襟凭小閣。日暮歸雲多。蒼蒼散草木。莽莽雜山河。荒野蟲亂鳴。長空鳥時過。萬象各無待。唯入顧紛羅。備物以養已。更用干與戈。天風吹我來。衣袂生微波。幽懷渺無寄。蕭瑟起悲歌。

得張正字書

送老茅屋低。天寒人跡稀。一觴尤有味。萬事已無機。歲暮塔孤立。風生鴉亂飛。此時張正字。書札到郊扉。

小閣

關千橫歲暮。徙倚度陰晴。木落太湖近。梅開南紀明。病餘仍愛酒。身後更須名。鶴鶴忽雙起。吾詩還欲成。

懷天經智老因訪之

今年二月凍初融。睡起蒼溪綠向東。客子光陰詩卷裏。杏花消息雨聲中。西菴禪伯還多病。北柵儒先只固窮。忽憶輕舟尋二子。綸巾鶴氅試春風。

牡丹

一自塵入漢關。十年伊洛路漫漫。青墩溪畔龍鍾客。獨立東風看牡丹。

盆池

三尺清池窗外開。芙蓉葉底戲魚回。雨聲轉入浙江去。雲

影還從震澤來。

西軒

平生江海志。歲暮僧廬中。虛齋時獨步。遡此西窻風。初夏氣未變。幽居念方冲。三日無客來。門外生蒿蓬。

晨起

寂寂東軒晨起時。朦朧草木暗疎籬。風來衆綠一時動。正是先生睡足時。

登閣

今日天氣佳。登臨散腰脚。南方宜草木。九月未黃落。秋郊乃明麗。夕雲更蕭索。遠遊吾未能。歲暮依樓閣。

歲華

歲華日已彫。飛葉鳴古瓦。白頭倚危檻。高旻覆平野。遙瞻

疎柳林下有清溪。瀉三春旣繁麗。九秋亦瀟灑。平生萬事
過。所欠茅一把。山川鬱日夕。有抱無與寫。賦詩老不工。開
篇詠風雅。

得長春兩株植之窓前

鄉邑已無路。僧廬今是家。聊乘數點雨。自種兩叢花。籬落
失秋序。風煙添歲華。衰翁病不飲。獨立到棲鴉。

九月八日戲作兩絕句示妻子

今夕知何夕。都如未病時。重陽莫草草。剩作幾篇詩。
小甕今朝熟。無勞問酒家。重陽明日是。何處有黃花。

拒霜

拒霜花已吐。吾字不淒涼。天地雖肅殺。草木有芬芳。道人
宴坐處。侍女古時妝。濃露濕丹臉。西風吹綠裳。

微雨中賞月桂獨酌

人間跌宕簡齋老。天下風流月桂花。一壺不覺叢邊盡。暮
雨霏霏欲濕鴉。

心老久許爲作書未果以詩督之

布衲王摩詰。禪餘寄筆端。試將能事迫。肯作畫工難。秋入
無聲句。山連欲雨寒。平生夢想處。奉乞小噴吮。

再用迹字韻成一首呈判府

風雨一葉過。黃花已陳迹。人貧交舊疎。歲暮日月疾。貪人
積胡椒。智不到鬼錄。那知庾郎菜。地瘦飽金玉。不如學服
氣。清坐了晨夕。尚餘煙月債。驅使入吟筆。晚逢葛先生。憐
我出無僕。借車得時詣。謬窺文字籙。談詩不知疲。或作夜
半客。揮毫寫珠玉。治郡益餘力。不羨江千萬。不慕李八百。

願傳公句法。容我附風翼。城東劉子政。著書方滿屋。昨示一篇詩。三日歎未足。仍聞供筆硯。家有樊通德。但恐裴公門。從此近捨湜。元忠有侍妾。嘗謂某曰。若人有可愛處。吾嘗記書中事。不審使之等。輒能知其處。詩成或使之寫。亦往往如人意。陳學士願聞斯語。

蒙示涉汝詩次韻

城南天倒影。綠浪搖十里。使君雲夢留。猶復錄此水。舟行及雨霽。秋色在葭葦。煙涵翠縠澗。月照金波委。知公已忘機。鷗鷺宛停峙。向來趨熱土。說似類應泚。俗子與清游。自古劇雨矢。如何有雙脚。受垢不受洗。異哉公殊嗜。記此兩苦李。詩成墮衡門。名字污紙尾。公詩賜某及家弟也。明當躡公迹。佳處不待指。會逢白沙渚。我舍真可徙。鳴騶儻重來。傍舫傾我耳。

遊峴山次韻

夜度一程雲。平明踏山址。山神豈如我。飛雨亂眸子。重岳袞袞去。前傑後俊偉。晦明更百態。始望那及此。路窮得精廬。稅駕諮祖始。老僧千金意。佳處相指似。先生一笑領得句。易翻水安石未歸山。却要山料理。奇哉此一役。驚世無前軌。酬山以快飲。春蕨正滋旨。一丘儻許予。高卧飽松髓。城中謾挂笏。那知有茲事。高人買山隱。百萬猶恨少。客見最省事。有屐一生了。東莊良不遙。十里望縹緲。縈紆竝麥隴。翠浪四山繞。先生滯鹿車。去程通風沼。暫來山泉上。息與飛雲杳。雲北接雲南。一逕絕紛擾。竹林懷風雨。目斷極窈窕。從來無世塵。相對真不撓。龍兒爭地出。頭角已表表。先生囑支郎。勿使斤斧天。

終當乞一杖。險路扶吾老。

和孫升之

姬國餘芳代有人。于今公子秀溪濱。處心如水尚書市。能賦臨流靜節君。花鳥紅雲春句麗。月梅疎影夜香開。囊開古錦湖山出。何意一星窺妙文。此和升之詠周堅仲十一年前到周子壁間有詩曾見之故有一星窺妙文之句

寺居

招提遠占一牛鳴。阻絕干戈得暫經。夢境了知非有實。醉鄉不入自常醒。樓臺近水涵明鑑。草樹連空寫素屏。物象自堪供客眼。未須覓句戶長扃。

又用韻春雪

急雪催詩興未關。東風肯奈鳥鳥寒。最憐度燭動動意。更

接飛花細細看。連夜拋回三白瑞。及時驚動五辛盤。袁安久絕千入望。春破還思綺一端。

次韻邢子友

壯士如今爛莫收。尚息抽矢射旄頭。不堪苦霧侵衰鬢。稍喜和煙入戍樓。萬里中原空費夢。三春勝日偶成遊。青松遠嶺偏驚眼。薄晚闌干更少留。

梅

愛欲纖影上窻紗。無限輕香夜遶家。一陣東風濕殘雪。強將嬌淚學梨花。

蒙知府寵示秋日郡圃佳製。遂侍杖屨。逍遙林水間。

輒次韻四篇。上瀆台覽

歲月移文外。乾坤杖屨中。鏗然五字律。一作句儼及百夫雄。

秋入池溪碧。寒欺葉遍紅。此間兼吏隱。端不成遊嵩。客有山者歸以語公公以不得遊爲恨

鳥語知公樂。晴山及我遊。盡排物外事。拚作酒中浮。菊蕊離雙鬢。林峰隱四愁。騷人例喜賦。政自不關秋。

竹際笙簧起。回聽衆籟微。時陪物外賞。宜念日斜歸。草色違秋意。池光淨客衣。吟公清絕句。政爾不能肥。

一笑聊開口。千憂不上眉。林溪受風得。栢老到霜知。小憇逢筠洞。幽尋及枳籬。願公勤秉燭。裁詠棗離離。

送人歸京師

門外子規啼未休。山村日落夢悠悠。故園便是無兵馬。猶有歸時一段愁。

賦康平老銅雀硯

鄴城臺殿已荒涼。依舊山河滿夕陽。瓦礫却饒今日硯。似教人世寫興亡。

和顏持約

半篙寒碧秋垂釣。一笛西風夜倚樓。多少巫山舊家事。老來分付水東流。

早行

露侵駝褐曉寒輕。星斗闌干分外明。寂寞小橋和夢過。稻田殘處草蟲鳴。

次韻景純道中寄大成

聞道歌行伏李紳。古來賢守是詩人。八次廣樂懷披霧。一見周瑜勝飲醇。海內期公黃閣老。尊前容我白綸巾。佳篇咀嚙真堪飽。此日何憂甑有塵。

同家弟用前韻謝判府惠酒

觴杯樂聖便稱賢。無酒猶堪卧甕間。使者在門作僕僕。麴車入夢正班班。不煩白水真人力。來自言城道士山。千載

王弘全竝美。未應祀菊賦寒慳。

日飲知非貧士宜。要逃語竄稅心鞮。楚辭心鞮羈而不亂所須唯酒非虛語。以醉爲鄉可徑歸。鸚鵡鷓鴣俱得道。螟蛉螺贏共忘機。狂言戲作麻姑送。無奈關人與我違。

